

Date – 06/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Agriculture Minister Pu PC Vanlalruata chuan ram danga dan lova lei tha thawnchhuah thin titawp turin nasa taka hma an lak thu a sawi.
2. Mizo Diaspora Cell (MDC) chuan rampawna Mizote buaina tawh thinna tam tak chu passport lem hmanga Myanmar kaltlanga ram danga dan lova hna thawka kal te an nih thu an sawi.
3. Central YMA hruaitute chuan vawiin khan Hlimen leh Lungleng inkar PMGSY kawng leh Vairengte leh Sairang inkar kawng siam mek an enfiah.
4. Ministry of Civil Aviation chuan thuchhuah siam in Indigo chu khualzin tangkhangte tikhawtlai lo a an pawisa pe kir vek turin a hriattir.

<><><>

AGRI MINISTER

Agriculture Minister Pu PC Vanlalruata chuan ram danga dan lova lei tha thawnchhuah thin titawp turin nasa taka hma an lak thu a sawi.

Vawiina Ch. Saprawng Truck Terminal Rangvamual atanga loneitute hman tur lei tha phurtu lirthei a vailiamnaah he thu hi sawiin Minister chuan District hrang hranga Fertilizer Inspector, Police leh Magistrate-te nen tangkawpin heng dan lova leitha thawnchhuak thinte uluk taka vil reng an nih thu a sawi a. Kumin 2025 chhung hian leitha dan lova sumdawnna atana hman tur Urea Bag 5,424 leh DAP bag 300 man a nih tawh thu a sawi a ni.

Minister chuan sawrkar laipui thuchhuah zawmin Mizoram chuan Agriculture Department kaltlangin thlai chinna ram zau zawng mil leh thlaichinna leilunga thlai chaw awm zat (Soil Fertility) milin sawrkar laipui report a pek thin thu a sawi a. Chutiang chuan kumtin sawrkar laipui atangin Mizoram chanvo fertilizer loneituten tlawm taka an lei theih tur a dawn thin thu a sawi a. Mizoram quota lei tha hi a chanvo neitu loneituten MRP ngeia an lei theih nan leh hnianghnar taka an hmuh theih nan sawrkar chuan theitawp a chhuah thu a sawi a ni.

<><><>

KMMTTP

Sorkar laipui hmalakna kal mek Kaladan Multi- Modal Transit Transport Project (KMMTTP) hmalakna kal mek a Mizoram leh Mizo mipuite a a nghawng awm thei tur thil hrang hrang te thli thlaiIn vawiin khan Myanmar leh India inrina Zochachhuah leh Hmawngbuchhuah khua bakah a chheh vel khua te chu KMMTTP Impact Study Group Committee Chairman Pu.T. Lalhlimpuia chuan a tlawh.

Thudawn danin Act East Policy hnuai KMMTTP hmalakna kalpui mek hi sorkar laipui chuan Mizoram chhung atanga chhim lam Mizoram tawp Zochachhuah thlengin kawngpui sial hna a thawk zo tawh a. Zochachhuah (Mizoram) atanga Myanmar ram chhung lam Paletwa thlenga kawngpui sial tur he KMMTTP hmalakna hi tun dinhmunah hian kalpui mek zel a ni a, Sorkar laipui thuneitute chuan he lai hna thawh mek hi Kum 2027 ah chuan zofel turin an ruahman a ni.

VC of Correspondent Nutei

Mizoram tawp Myanmar ramri Zochachhuah khua a cheng khawtlang hruaitute chuan KMMTTP avanga Bangladesh mi dan lova Mizorama lut an awm rihloh thu an sawi a. Myanmar atang erawhin raltlan in 40 vel an khuaah an awm tih an sawi a. KMMTTP avanga hmasawna hi Myanmar lam chu a teltuah an tang hmasa mek tih sawiin an mamawh hrang hrang Mizoram atangin an chawlut mek tih an sawi a. Mizoram lam chuan Myanmar lam atanga chawkluh an la nei meuh lo niin an sawi bawk.

MLA Pu T. Lalhlimpuia leh amah tawiawmtute hian Mizoram Chhim tawp thlenga Rel kawng sial tumna Hmawngbu chhuah khua pawh an tlawh nghal a ni.



MIZO DIASPORA CELL

Mizo Diaspora Cell (MDC) chuan rampawna Mizote buaina tawh thinna tam tak chu passport lem hmanga Myanmar kaltlanga ram danga dan lova hna thawka kal te an nih thu an sawi.

Nimina an Chairman, Commissioner & Secretary to Chief Minister Pu Vanlaldina Fanai hoa an thutkhawmnaah he thu hi tarlan a ni a. Ram pawna case langsar zualte chu Dubai, Maldives, Nepal, China, Malaysia-ah te a thlen thu sawilan a ni a. Hei vang hian MDC chuan Mizoram atanga hnathawk tur emaw sumdawng turte chuan India dan leh an tlawh tur ram dante tha taka turin a ngen thar leh tih an sawi a. Tanpui ngaiten awlsam taka thu an thlenna tur te, an thu thlente rang zawka dawnsawn theihna tur te, best practices-te leh ram danga thawk turte tih tur leh tih loh tur te leh thil tangkai dang in hrilhriatnan Social Media Platform hman uar an rel a ni.

Mizo Diaspora Hub-ah hian hmun hrang hranga Mizo Welfare Association 40 an in ziak lut tawh a, an zinga 2 chu India ram pawna mi an ni a. Heng Association-te nen hian online meeting neih rawt a ni a, tam zawk an in ziah luh theih nan hmalak dan tur an sawi ho bawk a ni.



DRUG SEIZED

Nizan Khan Kolasib Police duty te chuan Kolasib District chhung Bukvannei leh Buhchangphai chhehvelah ruihhlo enfiah runpui buatsaihin hnamdang pakhat Dilwor Hussein, Hailakandi District, Assam man a ni.

An mi man hi Buhchangphaia cheng niin a hnen atang hian Ruihhlo (Heroin No 4 ni a hriat), sahbawn bawm pa 7 a thun an man a, Ruihhlo hlut zawng hi tualchhung rate ah chuan cheng nuai 16,71,000 man hu nia chhut ani.

Ruihhlo neitua puh Dilwor Hussein hi vawiin Khan Kolasib District Court ah hruai a nih hnu in Kolasib District Jail-ah dah luh nghal a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

CYMA LEADERS INSPECT ONGOING ROAD CONSTRUCTIONS

Central YMA hruaitute chuan vawiin Khan Hlimen leh Lungleng inkar PMGSY kawng leh Vairengte leh Sairang inkar kawng siam mek an enfiah.

Hlimen leh Lungleng inkar kawng siam enfiahnaah hian Central YMA President Pu R. Lalnggheta hoin CEC member mi 14 an tel a. PMGSY hnuai helai kawng siam hnathawk mek tu Contractor te hian hna an thawk muang nia hriat a nih avangin Central YMA te hian an en a, Contractor te chu chak zawk a thawk turin an ngen a. Central YMA President chuan YMA chu thil tha duh, chak tak leh tha tak ni bawk si a thawh duh an nih thu sawiin chulai hmuna thawkte pawh Mizo tho an nih anga Mizoram tana theihtawp chhuah tura an duh thu a sawi a. Kawng enfiahnaah hian Samtlang, Lungleng North leh Lungleng-I Branch hruaituten an lo tawiawm a ni.

Vairengte leh Sairang inkar kawng enfiahnaah hian an Vice President, Prof Lalnuntluanga'n hovin Treasurer Er. H Duhkima leh Fin. Secy. Pu MS Ralte leh CEC mi 5 te an kal thung a. Vairengte atanga Sairang inkar hi NHIDCL hnuai helai contractor 3 in open tender-a chhangin kumin July thla atanga thawk tanin July 2026 a thawh zawh tur a nih thu CYMA hruaitute chuan an sawi a. Tun thleng hian Contractor-te hian an thawh tur ang zat ve pawh an la thawk lo vek ni a an hmuh thu an sawi a. Central YMA hruaitute chuan NHIDCL hotute leh Contractor te chu nakum fur ruah tui thlak hma ngeia an hna zo vek tura hrilhin, an vil zui zel tur thu an hrilh a ni.

Central YMA hruaituten thla hmasa ni 8-a an kal ai chuan hna pawh an lo thawk ve viau a an hriat thu an sawi a. Hei aia nasa lehzuala chaka hna thawk turin an contractor te hi an hrilh a. Kar leh Thawhtanni atangin Sairang lam atanga hna thawk tan ve nghal turin Jain Infratech Co. hotute chu an hrilh bawk a ni.



NCC COMBINED ANNUAL TRAINING CAMP

NCC GP HQ Aizawl Group Commander Brigadier GS Arora chuan Mizoram sorkarin NCC Academy changtlung tak dinna turin ram a ruahman fel tawh tih a sawi.

1 Mizo Air Squadron NCC-in kumtina a buatsaih thin, Combined Annual Training Camp (CATC-132) chu State Training Centre, Tanhril-a vawiina a hawnaah he thu hi a sawi a. Group Commander chuan he Academy din tur hi NCC training na hmun changtlung tak tur, tunlai thiamna hmanraw changkang ber bera thawm tur a nih thu a sawi a. Hei hi hmarchhak pum tana 'centre of excellence' tur, academy pawimawh tak a nih dawn thu a sawi a ni.

Group Commander chuan NCC chu a hminga pawl ding ve mai ni lovin khawvela thalai intelkhawm pawl lian ber a nih thu leh thalai tam tak nun kaihruiatu, ram hmangaihna thinlung pu tura thalaite rilru kaihruiatu pawimawh tak a nih thu a sawi a. NCC chu hnam hrang leh nunphung hrang hrang nei thalaite suiikhawmtu pawimawh tak a nih thu a sawi a. Tunhnaiah Mizoram sorkar leh North East Region NCC Directorate tangkawpin Mizorama NCC dinmun tha zawka a thawm mek thu a sawi a ni.

VC Correspondent Nutei

Tun dinmunah Mizoramin Army NCC Battalion pathum leh Air Force NCC Squadron pakhat a nei a, anni hian a huhovin kum tin cadet 8,000 vel an zirtir thin a ni.



AVIATION MINISTRY ORDERS INDIGO TO CLEAR ALL PENDING PASSENGER REFUNDS

Ministry of Civil Aviation chuan thuchhuah siam in Indigo chu khualzin tangkhangte tikhawtlai lo a an pawisa pe kir vek turin a hriattir.

Ministry chuan thlawhna cancel emaw tih khawtlai emaw zawng zawng te chu naktuk zan dar8 hma in engkim pe kir vek turin a hriattir a, heti lam a thuneitute pawh khualzinte engmah chawi belh tir lo turin a hriattir bawk. Ministry chuan he dan zawm lo emaw an awm chuan dan anga hmalak a nih tur thu a chhuah a ni.

Ministry chuan khualzinte harsatna sutkian leh tihfel dan tur ngun taka ngaihtuah mek thu leh harsatna awm zawng zawng te chu a rang thei ang bera chinfel an tum thu an sawi a ni.

